

Ataatsimiinnerup ammarneqarnera

(Inatsisartunut sivisunerpaamik ilaasortaasimasut angajullersaat)

Assut nuannaarutigaaara Inatsisartunut ilaasortaqaatit 2014-imi Ukiakkut Ataatsimiinnermut matumunnga tikilluaqqusinnaagakkit.

Ataatsimiinnermi oqaluuserisassat pingaarutillippassuit oqaluuserisussaavagut, neriuutigaaralu pitsaasumik, inerititaqarfiusumik minnerunngitsumillu siunnerfilimmik suleqatigiinnikkut taakku angusaqarfiulluartumik oqaluuseriumaarivut.

Naalackersuisut inatsisiliortullu suleqatigiilluarnissaannik kissaateqarlunga taamatuttaaq Naalackersuisunut ilaasortat qamanna pisumik tikilluaqqakka.

Sineriassuatsinni isorartoqisumi nunaqqativut tamaasa TV-kkut, radiukkut inatsi-sartullu nittartagaatigut Inatsisartut ataatsimiinnerannik malinnaasut pinnitsoo-rusunngilanga aamma tikilluaqqussallugit.

Ilisimatitsissutigissavara Inatsisartunut ilaasortat tamarluinnangajammik ataatsimiinnerup ammarneqarnerani najuummata, Anders Olsenlu sila pissutigalugu sulitikinngitsoq, eqqaassanngikkaani. Naaja Nathanielsen New Yorkimiippoq Naalagaaffiit Peqatigiit ataatsimeersuarnerannut peqataalluni.

Ilisimatitsissutigisinnaavarattaq Inatsisartut sinnerlugit Ataqqinartorsuaq Dronning Margrethe Aappaat, danskit naalackersuisui, Folketingi, Islandimi Altingi Savalimmiunilu Lagtingi Nunavummilu inatsisartut Inatsisartut ukiuanni nuutaami pitsaasumik suleqatigiittuarnissamik kissaateqarlunga inuulluaqqusuteqarfigisi-magakkit.

Ilanngullugu nalunaarutigisinnaavara Inatsisartunut ilaasortaq Kaj Lyberth Siulittaasoqarfimmut qinnuteqarsimammat, ullumimiit, siusinnerusukkut sulinngiffe-qarnermi naaneraniit, atuuffimminit tunuarniarluni. Siulittaasoqarfiup tamanna ulloq 24. september akueraa. Taamaalilluni Saxtorph Didriksen Inatsisartuni sinniisussatut ingerlaannassaaq.

Taamatuttaa Inatsisartut ilaasortaq Kuupik Kleist, Inuit Ataqatigiit atuuffimminiit ulloq 29. september 2014 aallartittumik Siulittaasoqarfimmut tunuarniuteqarpoq. Tamanna Siulittaasioqarfiup ulloq 29. september 2014 akueraa, taamaattumillu Siulittaasoqarfiup ilanngullugu sinniisussamik ataatsimiigiaqqusisoqarnissaa akuerisimallugu.

Kuupik Kleistip sinniisussaraa Stine Egede Nørbæk, aatsaat Nuummut ulloq 6. oktober tikissinnaasoq. Astrid Fleischer Rex tamatuma tungaanut sinniisussatut atuutissaaq.

Qinigaanerup Misilinneqarnissaanut Ataatsimiititaliap Inuit Ataqatigiit sinniisussaatitaata Astrid Fleischer Rexip qinigaasinnaanera akuersissutigisimavaa.

Kuupik Kleistimut sinniisussatut Astrid Fleischer Rexip Inatsisartut ataatsimiinneranni peqataanissaa Inatsisartut akuersissutigissagaat matumuuna inassutigaa-ra.

Akerliusoqarnerluni.....

Astrid Fleischer Rex tikilluarit, Inatsisartuni inissannut ingissinnaavutit.

Taamatut oqaaseqarlunga 2014-imi Ukiakkut Ataatsimiinneq ammarneqartut nalunaarutigaara.